

大田縣志
第一卷


南表

地3/0.55


42
1.6




大田縣志



大田縣城市全圖




鎮 東 橋



巖

赤



均溪學校之新校舍

大田縣志卷首

新脩大田縣志序

官一邑者當知一邑之事故凡境內之疆域關隘賦稅物產以及習俗之好尚土地之肥瘠戶口之增減人物之盛衰與夫建置沿革之故政治得失之原必悉心考察詳盡無遺而後可以因地制宜勵精圖治若是者厥惟志乘以資考據田志昉於明嘉靖丙午前令會稽謝君距設縣不過一紀其時草昧初開規模粗具故所紀載僅紀其大略有清康熙乙丑一脩於慈谿葉君乾隆丁丑再脩於關中李君增補缺略視昔加詳迄于今百七十有二年矣滄桑已變兵燹幾經不惟文獻無徵卽欲求一全書亦幾不可得是以民國十三年尤溪

大田縣志卷首序文

梁君來署邑篆慨典籍之就湮毅然以脩廢爲己任延邑紳田君九臯林君春圃廖君良甫范君子威從事纂脩脫稿過半適地方變更梁君卸任去志事亦因以停滯迨十五年冬余承乏是邦謀所以成梁君之業又以黨務紛繁未遑脩舉幸今軍事結束地方安寧不忍以垂成之功聽其虧於一篑仍延田林廖范諸君添聘永春林君奉若分任編纂又徵敝邑孝廉王石峯先生以總輯之閱四月而書成公餘披閱見其區分三十七門悉依福建全省脩志總局擬定各縣志通用凡例雖與舊志體例不同凡舊志所已載者刪繁正謬各以其類相從蓋於舍舊圖新之中仍寓援古證今之意而又訪之耆舊參之家乘斷簡殘碑不辭尋繹遺聞軼事不憚蒐羅至於新政施行



爲時勢所需要者則擇焉必精語焉必詳尤足以發明新義喚起國民非徒求工文字而已嗟乎事之舉也在人而其成之也有數以余所聞田志之奉令續脩也在民國六年其提議修輯也在民國九年其限期脩成也在民國十三年顧或因費絀而未行或以變故而中止今乃於地方俶擾之餘成此殘缺廢墜之篇固知氣數使然而諸君子載筆之功與梁君提倡之力固非淺尠也至余以淺識庸才忝蒞茲邑竟得樂觀厥成附名簡末更可謂幸遇矣故喜而書之

中華民國十七年八月

署大田縣知事龍潯陳朝宗撰

新脩大田縣志序

大田山水清巉洞壑宏邃有大羅巖者宋時子朱子嘗遊於此生其地者被服先賢之化家禮樂而戶詩書故文章節義科第宦遊後先輝映初係漳德永尤四邑割境有明嘉靖間御史奏請劃地增邑值予世祖高公以明制科出宰山東泰安縣江西萬載縣告老歸田爲開邑督辦築城于鳳山之麓縣治建焉工未告竣而公謝世遺子塘公接辦故家有傳其省解經費轉落奸徒之手換以瓦缶封藏當是時公方四顧無策而不知誠之所感天必助之忽有白馬阻道公初不解其爲銀也及其奔入池中毫光冲起卽變爲銀築城之費卽在於是其所獲銀額恰與瓦缶之數相符厥後邑築落成蒙賜凌雲坊

匾額以彰勞績特憾地之相去隔二百餘里無由一至與父老昆弟叙述軼事客春攝篆來田訪舊志則茫乎莫考嗟乎志之難也卽至酈元李勃且不免因陋就簡况大田之志設縣後越十餘年經會稽謝君始爲輯纂山川風俗文人宦客就令雖有紀載然時當草創未免書缺有間不能包舉靡遺迨前清乾隆間關中李君再加討論事本由舊文則增新詳載較確其視前志誠有差強而無不及距今百數十載星移物換嗣是不修則卷帙漫漶亥豕魯魚後之人何從徵文考獻此非有司之責而誰責哉予自代庖以來城池聖廟市場道路以及橋梁諸要政莫不一一修舉停柩溺女罔不特申勸戒剪除惡習矧邑志爲巨典攸關而敢漠不加意乎今春與邑之縉紳學士

謀所以脩輯之舊者仍之新者增之無差訛無遺漏其去取體例悉倣閩清縣志分爲三十八類編成八卷秉筆者文學林君韶光暨田廖范三君同襄其事大約繁而不失之冗簡而不失之略成爲一邑之信史皆賴諸君子才擅著作之力也予則何功焉第念前人經營摩畫之始幸而偶履斯土數典敢忘其祖乎聊叙數言以附簡末識者當不以予爲妄也

中華民國十四年五月

署理大田縣知事梁伯蔭叙

新脩大田縣志序

近世之言志乘競稱朝邑武功矣以體例嚴而文賅括也然則朝邑武功而外遂可以無志乎非也夫春秋爲千古史家權輿同時而有晉乘史記爲三代下傑作繼起仍有漢書蓋紀一邦文獻志一方名勝與夫時局滄桑戶口之盛衰禮俗之沿革在在胥關緊要雖屬詞有繁簡不同而同爲紀事之書則一也田邑志乘創始于謝公庭訓

明嘉靖廿五年

一脩于葉公振甲

清康熙廿四年

增編于周公卜世

清康熙三十二年

至李

公慧重脩

清乾隆廿二年

乃燦然大備第自李公迄今亦百有七十餘年矣

天意日革其舊人事日卽于新爲問康乾時代流風遺俗猶有存焉否耶朝章國故得無異焉否耶且更問繼茲以往世界潮流其同于

大田縣志

卷首

序文

五

今日否耶其不同于今日否耶皆在不可知之數也前不見古人後不知來者惟恃採訪所及以備一朝紀載脫並此而抱殘守缺閱世生人而後致慨文獻無徵斯亦考古之憾也民國庚申省公署釐訂志例門類通飭各縣一律脩輯以聞時適范公維在任卽開局派員採訪未竟而時局中變甲子春伯蔭梁公繼任委范教育長松蹊任志局坐辦以詔與田子九臯廖子良甫任脩纂范子子威任測繪越歲脫稿以握槩之不可苟擬更俟名宿刪潤壽諸梨棗而時局又中變本年春陳縣長朝宗念志乘停輟至再未有成書心焉戚之亟聘龍潯孝廉王石峯先生蒞田總爲纂訂刪繁就簡潤色文章緯候一門並添聘桃源林子奉若以足之而全書遂以告竣回憶庚申始事

之秋以迄今日集數子之所長閱九年之歲月斯志之成其殆有似于鄭之爲命乎夫脩志非難于鋪張而難于審核非難于淹博而難于謹嚴自非審于史裁精于古文家言殊未易以語此慨自文學革命以來晨星碩果逐漸飄零其尙存之魯靈光亦如天寶梨園退閒已久雖能聆音識曲奈都羽換宮移斯道其殆如廣陵散矣茲幸以刼餘身世獲與二三舊雨賚油素弄柔翰晤教名孝廉以蔚成一代志書縱未足比美武功朝邑追踪于古作者之林要亦前民矩矱留遺也詎不差堪告慰哉然詔因之有感焉田以明嘉靖十四年置邑原爲爾時弭盜計越十二載志書成而盜以靖民元以降田罹匪禍較前尤酷意者志乘告歲百里雷封庶幾潤色太平永慶文明郵治

乎是尤詔所私心禱祝希冀靡已者耳

中華民國十七年八月大田縣脩志局脩纂員邑廩生林詔光撰

大田縣志舊序

禮科余 曠樂平
給事

志者史也史以載王國之政志以紀封域之績雖其體有詳略之殊其爲紀事之書則一而已况偏郡下邑新造草昧苟無志以紀之則其政令之因革人物之興謝建置之廢舉不數十年俱澌滅無聞將何以昭勸誠樹風聲而立軌物也哉是志爲政之首務在新邑尤不可忽焉者延平所屬舊特六縣而已嘉靖乙未大田士民負固猖獗官爲難治別駕林公元綸議增邑控制之侍御白公可其議乃請於朝割尤溪漳平德化永安之地統於大田張官置吏邑斯建焉自建邑十餘年來盜雖少息然其土俗獷悍好鬪爭相詰告俗尙未純壬寅春謝尹廷訓奉命來理是邑抗志師古留心經理增其所未備補

其所不足故其規爲制度始克就緒民亦駸駸易其舊習又大懼人文放逸乃於暇日彙輯縣志志完持以獻於余請序公餘披覽綱紀畢陳體國經野可以按籍而稽山川風物可以披圖而較若夫賦役田土陂堰陵陸與夫祀典選舉等項大小悉詳顯微悉著吁謝尹之用心可謂勤矣謝尹之爲謀可謂遠矣勤且遠大田之政不於是可觀哉但其間載述泛濫識者病之然予以新邑之志寧過於泛無過於簡蓋泛則後有所稽考而參訂若簡則併其事實而忘之矣昔歐陽公修新唐書公自謂其事則增於前其文則省於舊劉元城以爲文省事增正新書之失况大田新志而務於簡後何以折衷是無害於泛也然其去取謹嚴名實不失志之體段已大具矣乙巳冬予自

建陽移貳延平延平山水清麗甲於他郡居嘗欲登歷徧覽以盡知民瘼盡探奇絕然有志未遂但於各邑志中得其大概而已惟大田之志無所考今謝尹能成是編予一覽之盡得其民風土俗山川疆界忠孝節義行實是不出戶庭而大田之故可坐而得矣豈惟一縣之益而已因書以引篇端

又舊序

灑州楊大章 舜江

嘉靖丁未余僉閩臬出按延之大田田尹謝子廷訓公謁之餘以邑志進曰是邑也建置不十載諸多草創願廣其所未及余觀其書紀載頗悉規制亦備率皆謝子所經畫良可嘉尙乃與按圖授策察其險隘爲保障之謀因語謝子及掌教陶子清臣輩曰諸君其知建邑

大田縣志 卷首 序文

八

之意乎邑當延泉漳三郡之交若德化漳平龍巖永春永安尤溪諸邑皆犬牙聯絡之區通逃悍卒流入其地呼引日繁則集而爲盜且山谷阻深易於潛匿彼此出沒閃倏無常故緝捕之禁雖嚴而卒莫能盡當事者苦其難制而請爲之邑誠至計也然析數邑之地而邑之合數邑之民而官之收放合離俾協於一斯亦難矣揆其所以治之之要無他亦惟弭盜焉耳弭盜之方有二曰清其源也塞其流也何謂清源富之以裕其生教之以淑其行則民自不肯爲盜何謂塞流申其禁使知所畏密其防使無所容則民自不敢爲盜二者兼舉而盜猶不息吾不信也然舉斯二者實惟有司者之責觀風之巡察監司之督訓亦惟責厥成焉盜息則民安民安則建置之意思過半

矣抑猶未也余觀邑治當衆山會聚之所四面環繞如拱如揖中則原田膺膺一溪在前其光嶽所萃亦若合數邑之秀而會於一者然吾聞之人不天不因天不人不成田之形勝特異固有可因而振興文教移風善俗以成厥美者則有司暨師長之責也謝子陶子吏茲土也有年矣其加意政教也亦勤矣繼自今益勤無懈則人文日盛風氣日開天人協應而科第之英必將接踵而出蓋不惟盜息民安而且上躋文明之治矣斯固建邑之初意亦區區責成之至願也諸君其勗之哉時嘉靖丁未年冬十二月

又舊序

延平府 范來賢 海虞 知府

明嘉靖乙巳冬予承乏延平閱府乘獨大田縣未載考厥故以縣治

大田縣志

志

卷首 序文

九

新設故紀載尙遺予亟欲補之未得勝事者迺丙午維夏縣令謝子廷訓邑博陶子清臣以縣誌進予覽之深嘉其成吾志之未發也然猶不能無懼也夫志將以傳後也匪公弗協匪博弗詳匪慎弗覈弗協弗詳弗覈斯弗信弗信弗傳矣咨訪蒐輯品藻去取無少忽焉二子蓋不能以無懼也夫有所懼則不敢爲不善不爲不善則必日進於善矣子之誌大田也其盡公耶博耶慎耶迺於政事稍暇喜雨沾足就溪山第一堂而覽之終篇焉則見其首之以天文次之以地理又次之以王制與夫建置封域宇室城池官爵版籍水利津梁學校選舉祀典兵防前哲之留題騷人之吟詠郵亭寺觀之殘編斷簡纖悉備載葑菲不遺可謂詳矣至於人物去取足爲勸懲亦庶幾於公

矣慎矣足以資吾化理矣可以傳矣夫詔來庶資於既往質行亦寓乎其間蓋不專事於文焉而已也世降道亡化漓習蘇良守哲令代不數人若夫守己之慎行政之公處事之精詳密察皆於是乎觀焉凡吏茲土者可不懼歟可不謹歟柏坡余子細林楊子聞予言僉云可志也遂書於首簡

又舊建志文移

大田縣謝廷訓

誌者志也所以昭往而鑒來也今之志其古之史乎古者列國各有史以紀事而彰善癉惡之法嚴大田雖四十里曠衍不啻五倍國當子男列史固宜矧割自三府四縣而哀多益寡之制樽節愛養之宜散溢荒唐漫無統稽志又不可缺也或曰郡有志縣可略也愚謂家

大田縣志

卷首序文

十

之大宗小宗以紀近承遠而近者親焉故統志始祖也省志郡志者別子繼別之宗而縣志則繼禰之宗也繼禰者聞見切而授受正志其真實而足徵者乎予考天文以定域建地圖以別野作新編以勵政嘗志古而未逮自今觀之草昧啓疆天道寓焉鑿耕濬流地道順焉撥正反亂人道具焉志不立則事靡而道晦政泯而俗偷曷從化今而傳後志尤當務之急焉者竊惟作志之道務在廣而詳精而核以期信久不迷至公縣之名山大川古哲騷人郵亭觀寺碑銘墓志殘編斷簡無處無之予日訪求而未得諒在故國有典之者故家有藏之者故老有傳之者道不容於自秘而志奚可以自遺諸賢士教育茲土而邑師陶子庠生廖憲等學以該博文以經緯采而輯之拾

遺發秘則天之文可指掌觀也地之理可按圖索也人之事可閱卷
昭也聿成良史輝耀吾邑有補名教萬萬如文禮樂以俟君子而折
衷之予不敢妄僭也於是乎請之時嘉靖二十五年丙午歲

又舊跋

大田知縣劉維棟 粵興

夫志記也邑有志記邑之事以傳後也匪博弗詳匪覈弗實實斯信
信斯傳者也大田昔以文獻甲閩中余嘗私心艷羨之已而吏茲土
蚊負是懼日惟兢兢既考志書則見草創未核闕略未補何以信今
傳後乎誠爲缺典然雖有司之責自惟款啓無聞不敢自任操觚以
貽大方笑其素心也會直指陸公觀風考俗檄下郡縣脩諸志余欲
辭謝不敏以避僭名不可得已於是從而考訂刪之續之訪諸通邑

大田縣志

卷首序文

十一

故老之傳聞士夫之遺集世族之家乘編次名例彙爲三十一卷上
之道道曰是足以徵矣又上之府府曰是足以徵矣至質之士民縉
紳先生僉曰然於是捐俸以梓之一班之窺何當大道聊以記事使
後之君子有所徵信而已夫古今有佞史有謗史有穢史佞史稱善
無實也謗史紀惡無實也穢史則是非無當記述鄙俚不可爲訓也
棟之矢公矢慎不敢以無實干天刑自信有之至於斟酌損益以成
不刊之典則未也倘原棟者曰爾其非謗非佞棟不敢辭責棟者曰
爾猶不免於穢史棟亦安能辭乎哉時萬曆辛亥仲冬月

又舊序

大田縣知縣葉振甲

壬戌夏五候銓部除閩之大田卽覓輿志塗經皆茫無可考心竊異